

Aidilfitri bantu kempen PAS Kelantan?

MalaysiaKini.com

21 Ogos, 2012

Oleh Jimadie Shah Othman & Abdul Rahim Sabri

Kedatangan Aidilfitri pastinya dinanti-nantikan seluruh umat Islam; bagaimanapun bagi PAS Kelantan, manisnya mungkin berganda.

Ini kerana, sebagai parti pemerintah, mereka lebih berpeluang menganjurkan pelbagai program sambutan menjelang dan semasa Hari Raya, termasuk mendekati anak negeri yang berperantauan.

Bagi pemerhati politik, keadaan ini amat menguntungkan, lebih-lebih lagi jika pilihan raya berlangsung tidak lama selepas hari raya Aidilfitri.

Dalam pilihan raya umum lalu, parti Islam itu berjaya bangkit daripada kemenangan tipis pada 2004 dengan meninggalkan BN hanya enam daripada 45 kerusi Dewan Undangan Negeri (DUN). Sebuah lagi kerusi dimenangi sekutunya PKR.

Kejayaan itu dianggap pelbagai pihak ekoran kejayaan mereka mendekati golongan muda dan pengundi luar negeri Cik Siti Wan kembang itu.

"Setelah belajar daripada 2008, strategi ini mungkin digunakan kembali. Sebabnya, pengundi dalam negeri, di kampung-kampung dapat dicula dengan mudah. Siapa memang dan jumlah undinya sudah tahu.

"Tetapi ini tidak boleh dibuat terhadap pengundi yang baru pertama kali mengundi dan pengundi luar daripada Kelantan," kata penasihat eksekutif Ilham pusat tinjauan bebas Ilham Center Hisomuddin Bakar.

Hisomuddin berkata, golongan itu amat penting didekati kerana mewakili kira-kira 30 peratus daripada seluruh pengundi negeri itu.

Katanya, walaupun program sambutan perayaan hanya mampu menambahkan sokongan paling banyak sehingga 5 peratus, tetapi ia penting bagi PAS untuk mengekalkan sokongan sedia ada, sekitar 70 peratus daripada pengundi luar.

BN boleh ambil pendekatan sama

Malah, terdapat cakap-cakap bahawa Menteri Besar Datuk Nik Aziz Nik Mat kini terpaksa bertungkus lumus menemui seramai mungkin pengundi luar menjelang pilihan raya yang dijangka tidak lama lagi dengan mengambil peluang sempena ketibaan Hari Raya.

Bagaimanapun, menurut seorang aktivis persatuan anak negeri, tindakan yang sama juga mungkin diguna pakai musuh politiknya daripada BN.

"BN pun mungkin sudah belajar daripada kesilapan pada 2008. Dulu mereka tak kisah pun dengan persatuan anak negeri (Kelantan di perantauan)," kata Penasihat Persatuan Anak Darul Naim Selangor dan Kuala Lumpur (PERSADA), Wan Johari Wan Omar.

Ditanya tentang isu utama yang boleh mempengaruhi undi golongan itu, Wan Johari berkata, ia masih berkisar soal kemudahan akses ke negeri itu, termasuk pembinaan lebuh raya.

"Isu lapangan terbang, kena banyak penerbangan, jalan nak balik mesti mudah dan bila dah sampai sana mesti tak sesak. Itu sebab menteri besar sebelum ini umum projek Lebuh Raya Rakyat baru-baru ini," katanya lagi.

PERSADA adalah antara NGO yang aktif selain Persatuan Anak Kelantan Perantauan Malaysia (Perakan) yang dianggap sebagai "badan payung".

PAS Kelantan nafi sokongan merosot

PAS Kelantan ketika dihubungi Malaysiakini bagaimanapun menolak tanggapan bahawa PAS kini lemah sehingga terpaksa menggunakan sambutan hari raya untuk berkempen.

Sebaliknya, sokongan rakyat termasuk di perantauan kepada kepimpinan Nik Aziz dikatakan semakin bertambah sejak berjaya menekan kerajaan pusat dalam isu royalti minyak dan gas yang dituntutnya.

"Itu (sokongan merosot) tidak betul. PAS Kelantan dan Pakatan Rakyat mendapat sokongan daripada rakyat secara menyeluruh.

"Ini kerana isu-isu tempatan seperti royalti, bukan kerajaan negeri sahaja yang menuntut, tetapi rakyat sendiri kini juga menuntut," kata ketua penerangannya Dr Mohd Fadzli Hassan.

Anggota Dewan Undangan Negeri (DUN) Temangan itu bagaimanapun tidak menolak kemungkinan ia "memberi kesan" kepada PAS dan Pakatan Rakyat sekiranya majoriti anak Kelantan tidak pulang untuk mengundi.

"Mereka ingin mengetahui suasana politik di Kelantan seperti mereka buat (majlis berbuka puasa) baru-baru ini di Karangkrak (di Shah Alam).

"Kita buat sekerap mungkin untuk penduduk luar Kelantan mengetahui suasana politik," katanya lagi.

Sementara itu, seorang pemimpin kanan yang enggan namanya disebut berkata, kebimbangan terhadap kemerosotan sokongan anak negeri hanya tanggapan yang sentiasa ditimbulkan apabila pilihan raya semakin hampir, yang didakwa menjadi trend sejak 1990.

"Bagi saya kebimbangan itu sentiasa wujud disebabkan konfrontasi parti politik sebagai permainan fikiran untuk menarik sokongan rakyat," katanya.

Copyright © 1999-2012 Mkini Dotcom Sdn. Bhd

Source: <http://www.malysiakini.com/news/206751>